

Igl emprem vin dil Rein

Aron Candrian e sia famiglia han presentau il «Resvegl 2016» da Sagogn

DAD AUGUSTIN BEELI / ANR

■ **Avon tschun onns han els plantau la vegna. Finamira dad Aron Candrian e sia famiglia ei stau da producir in vin alv e da cuntinuar culla tradiziun da viticultura sin quella spunda sulegliva a Sagogn. 166 butteglia ha l'emprema raccolta purtau.** Deplorablamein astgi el buca vender il vin, explichescha *Aron Candrian*. L'emprema raccolta ha era buca purtau la massa. Denton la massa ei era buca quei ch'ei necessari. La qualitat, gliez ei quei che quenta oz ella viticultura. E la qualitat dil «Resvegl» ei excellenta. In vin alv cun aroma dultsch-fritgus. Ins gusta puunas e mango. Las iuas ch'il viticultur da hobi ha raccoltau silla parcella a Sur Vilada ein carschidas sin terren adattau, ed ellas han giu bia sulegl. Igl ei la pli emprema raccolta da vin sin ina surfatscha ch'ei limitada sin 400 m². Dapli vegnas astga el buca cultivar, il cataster viticol grischun define-scha exclusiv zonas el Signeradi, Tschun Vitgs, Cuera e Favugn. A novas vegnas mett'ins cundiziuns rigurusas.

300 enfiarlas

Atgnamein ei la vegna a Sagogn gnanc ina nova. En quei territori deva ei gia egl 8avel tschentaner vegnas. «Item curtinum cum pomiferis suis. Item ortos ed vineas subter curtem ex integro» eis ei scret el testament digl uestg Tello. Igl onn 765 ha quel fatg si alla claustra da Mustér il bein che la famiglia dils Zaccos possedeve en Surselva. A Sagogn possedeve el in curtgin cun pumera, orts e vegnas. Quellas vegnas ein documentadas, e tras la tradiziun orala han ins adina saviu ch'ei deva inagada vegnas. Ins ha localisau quellas a Sur Vilada, Bregl da Heida, Valetta e Quadras. Quella tradiziun orala ha intimau Can-

drian da Sagogn d'empruar co ei fuss da plantar puspei vegnas a Sur Vilada. Ses geniturs *Hannes e Vroni* e siu frar *Martin* han susteniu el. Era la proprietaria dil sulom ei stada d'accord ed ha affittau alla famiglia la parcella aposta per quei intent. Cun agid d'amitgs ed enconuschents han ils Candrians plantau ils 28 d'avrel 2012 300 enfiarlas dad iuas dalla sort Solaris. Igl ei ina sort robusta e cumprovada ch'ei derasada en vegnas dalla Turgovia ed a Schaffusa.

Cun buna speranza ha il viticultur da hobi Aron Candrian instradau il project. La tgira dallas 300 enfiarlas ha el saviu confidar al bab che fuva gest vegnius pensiunaus. Igl onn 2013 ha lez tagliau anavos las tortas. In onn pli tard han els stuiu plantar suenter enfiarlas che fuvan piri-

das. Igl onn 2015 han las viaspras attaccau la vegna ed «engulau» la raccolta. Gia lu havess ei dau ina buna emprema raccolta.

Limitau sin 400 m²

Igl onn vargau fuvan Aron e siu bab averti. Mintga singula trocla han els schurmegiau cun in satget special. En tut hagi il bab mess si 2500 tals satgets, in'jamna seigi el staus occupaus cun quella lavur, raquenta il viticultur da Sagogn. Las viaspras ein buca vegnidas vitier ed aschia ei igl emprem vin staus garantius. El liug fetg sulegliv drizzaus viers sid ein las iuas carschidas e madiradas optimal. Igl 1. d'october 2016 ha la famiglia saviu raccoltar l'emprema gada 200 kilos iuas biologicas. Aron ha purtau la raccolta a

Fläsch tiel viticultur *Roman Hermann*. Leu ein las iuas idas tras las maschinas usitadas, quella d'allontanar las iuas dallas troclas e quella da smaccar. Lu han ins dersch il suc «alv» el butschin d'itschal per la fermentaziun.

Il resultat che Aron Candrian ha presentau l'entschatta matg a zacons enconuschents ei empermettents. Ei savess esser ch'ei dess el futur motivs da slargar il cataster cantunal da vegnas. Il producent ei satisfatgs da quei ch'el ha saviu degustar ed era ils producents el Signeradi han spir laud pil vin da Sagogn. Las 166 butteglia cumprovan ch'igl emprem vin dil Rein ei buc ina idea ni in'experiment stuorn. Anzi, il vin ch'el ha numnau «Resvegl» ed era etichettau aschia pudess esser in cussegl confidenzial pil futur.



Aron Candrian gusta per l'emprema gada il «Resvegl», carschius ella vegna a Sur Vilada a Sagogn.

FOTO A. BEELI